

17. Oktober 2025

UKA2025/145+147

Pisortat suliffeqarfiutaanni tamani inuttassarsiuussinerit suliamut tunngasumik piginnaasaqarnissaat piumasaqaataassaaq, kalaallit oqaasinik piginnaasaqarneq ilanngullugu kiisalu kalaallit kulturiannut kalaallillu inuiaqatigiivinut ilisimasaqarnissaat pillugit Naalakkersuisut Inatsisartunut inatsisissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Inatsimmut siunnersuut UKA2026-mi kingusinnerpaamik saqqummiunneqassaaq.

(Inatsisartuni Naleqqap Gruppia, Naleraq)

Pisortat ingerlatsiviini kalaallit oqaasiisa pisortatigoortumik atuutsinneqalernissaasa saniatigut oqaatsit nutserneqartarnissaannut piumasaqaatip peersinneqarnissaa pillugu Naalakkersuisut allannguutissamik siunnersuummik suliaqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Pele Broberg, Naleraq)

Siullermik siunnersuuteqartunut Naleqqami gruppi mut Pele Brobergimullu qujanaq.

Siullertut Siumumiit oqaatigerusupparput siumut anguniagarimmagu pingaartitaralugulu nunatsinni pisortat allaffissornerat kalaallisut oqaatsigut atorlugit ingerlatsinissaq, innuttaasunillu sullissinermi oqaatsitta salliullutik inissisimanissaat. Siumumiillu aamma isumaqarpugut pisortat allaffissorneranni sulisorisat katitigaanerat qaqugukkulluunnit nunami maani innuttaasut katitigaanerannut naapertuuttumik inissisimassasoq.

Ilisimasatsituut qitiusumik allattoqarfimmi sulisunik aamma suliffeqarfinni namminersortuutitani ilaalu ilanngullugit pisortaanernik atorfinitsitsisarneq massakkumut kaajallaasitaq 2017-imeersoq aallaavigalugu ingerlanneqartarpoq. Kaajallaasitaq pineqartoq inuiaqatigiinni aammalu inatsisartuni qinigaaffinni kingullerni aamma oqallisigineqartoq, ilaatigut ersarissaassutigineqarnissaa oqariartuutigineqartarluni, maannakkumulli allannguisoqarnikuunngilaq.

Siumumit pingaartitaraarput aaliangersakkat oqaatsitta atorneqarnerannut annertusarneqarneranut siunertaqartut, nunaqqatitsinnik misilittagalinnik aammalu ilinniarluarsimasunik atorfinitsitsisarnermut qularnaarinninnissamut siunertaqartut ersarittumik paatsuugassaanngitsumillu inissisimanissaat.



Massakkullu kaajaallaasitaq atuuttoq arlalitsigut paatsuunganarsinnaasunik imaqarpoq. Siullertut assersuutitut ersarippoq atorfinitsitsiniarnermi nittarsaassinermi allassimasoqassasoq oqaatsigut piginnaasatut piumasaqaatit ilaattut nuisatinneqartassasut, aammalu kulturitsinnut inooriaasitsinnillu ilisimasaqarnissaq. Soqutiginartuali uaniippoq nalilersuinermi atorfinnik nalinginnaasunik nalilersuutitut oqaatsitsinnik piginnaasaqarnissaq ilaanngimmat, tassami tamakkiisumik isigalugu nalilersuinissaq piumasaqaataammat. Akerlianik taamaallaat oqaatsitsinnik piginnaasaqarnissaq pisortaanertut tassa departementschefinik direktørinillu atorfinitsitsissatilluni nalilersuutissat ilaattut allassimavoq oqaatsitsinnik piginnaasaqarnissaq, kulturitsinnik aammalu inooriaatsitsinnik.

Namminersornermut inatsit naapertorlugu kalaallisut oqaatsigut pisortatigoortumik oqaaseraagut, taamaattumillu matumani Naalakkersuisup siulittaasuanit akissuteqaatigineqartoq, tassa oqaatsit tamat oqartussaaqataanerata aqqani nunatta ineriartortinneqarnissaanut aporfilersuutaassanngitsut, kiisalu anguniagaqatigiinnermi ineriartortitsinikkut Kalaallit Nunatsinni oqaatsit atorineqartut kulturikkut inooriaatsikkullu nukittorsarneqarnissaat Siumumiit eqqarsarnartoqartipparput.

Siumumiimmi isumaqarpugut pisortatigoortumik oqaatsigut tassaasut kalaallisut oqaatsigut, namminersorneq pillugu inatsimmi naqissusigaasut, tassaasullu nunap nunaminit ineriartortinneqartup tunngaviusumik oqaaserisai, taakkuullutillu aamma inuiannit allanit ilinniarneqarsinnaasut, soorluttaaq aamma uagut inuiaat allat oqaasiinik ilinniarnissamut periarfissaqartugut. Taamaattumik Naalakkersuisut akissuteqaataanni avataanit sulisunik tikiisitsisarnissap pisariaqartinneqarnera suli piosoq avaqqunneqarsinnaanngitsutut isigalugu, avataaneersunut atorfinnilu qaffasissuni atorfinittunut oqaatsitsinnik ilinniarsinnaanissaq piumasaqaatitut nalilersorneqarnissaa Siumumit kissaatigaarput. Taamattaq Naalakkersuisoqarfinni silassorissuusiap nutserinermut annertunerusumik atorineqartalernissaa innersuussutigerusupparput, tamanna allaffissornikkut eqaallisaanermik aammalu aningaasarpassuarnik sipaarutaasinnaanera annertuumik kinguneqassammat.

Taamaattumik inuiaqatigiit suliffeqarfiutaanni pisortaanertut atorfinitsitsinermi kalaallisut oqaatsitsinnik atuisuunissap piumasaqaataalernissaa Siumumit ersarissartikkusupparput. Siumumit isumaqarpugut atorfinitsitsiniarnermut naliliinermilu ataatsimiititaliani (ansættelsesudvalgit) inuttalersuisarnissaq kalaallisut oqaasilinniit ilinniarsimassutsikkut piumasaqaatinik naammassinnissimasunik inuttalersorneqartarnissaa ilanngullugu piumasaqaataalissasoq, taakkuummatami piumasaqaatinik naliliilluarnerusinnaallutillu ilisimasaqarluarnerusut.

Siunnersuutit kattunneqarneranni Naalakkersuisut allannguutissatut siunnersuutaanni nutserinermuinnaq matuma sangutinneqarnera uggoralugu Siumumit imaattumik allannguutissatut siunnersuutigerusupparput:

“Qitiusumik allattoqarfimmi sulisunik aamma suliffeqarfinni namminersortuutitani il. il. pisortaanernik atorfinitsitsisarneq pillugu kaajallaasitaq nutarterneqassasoq. Taamaasiornermilu allaffissornikkut aningaasartuutit appartinneqarnissaat anguniarneqassasoq silassorissuusiap atorluarneqarneratigut,



kiisalu atorfinitsitsisarnermut ataatsimiisitaliami kalaallisut oqaatitsinnik kulturitsinnillu ilisimasalinnik piginnaasaqartunillu inuttalersorneqartalernissaa piumasaqaataatilersillugu kaajallaasitaq nutarterneqassasoq. Tamakku tunngavigalugit Naalakkersuisut inatsisissanik kaajallaasitanik maleruagassanillu pisariaqartunik kingusinnerpaamik UKA2027-mi Inatsisartunut saqqummiussissuteqassasut.”

Taamatut Siumumit oqaaseqarluta siunnersuutip partiiniit amerlanerussuteqartuniit taperseerineqarnissaa siunertaralugu, ataatsimiititaliamut susasaqartumut ingerlateqqinneqarnissaa inassutigaaq.

Erik Jensen

Siumut